

Wallensköld

I.

Ahi! Amors, com dure departie
Me convenra faire de la millor
Ki onques fust amee ne servie!
Dieus me ramaint a li par sa douçour,
Si voirement con j'en part a dolor!
Las! k'ai je dit? ja ne m'en part je mie!
Se li cors va servir Nostre Signor,
Mes cuers remaint del tot en sa baillie.

II.

Por li m'en vois sospirant en Surie,
Car je ne doi faillir mon Creator.
Ki li faura a cest besoig d'aïe,
Saiciés ke il li faura a grignor;
Et saient bien li grant et li menor
Ke la doit on faire chevalerie
Ou on conquiert Paradis et honor
Et pris et los et l'amor de s'amie.

III.

Dieus est assis en son saint iretaige;
Ore i parra con cil le secorront
Cui il jeta ce la prison ombraje,
Quant il fu mis ens la crois ke Turc ont.
Honi soient tot chil ki remanront,
S'il n'ont poverte ou vellece ou malaige!
Et cil ki sain et jone et riche sont
Ne poevent pas demorer sans hontaige.

IV.

Tot li clergié et li home d'eaige
Qui ens ausmogne et ens biens fais manront
Partiront tot a cest pelerinaige,
Et les dames ki chastement vivront
Et loiauté feront ceaus ki ironr;
Et s'eles font par mai conseil folaige,
A lasques gens mauvaiscs le feront,
Car tot li boin ironr en cest voiaige.

V.

Ki chi ne velt avoir vie anuieuse
Si voist por Dieu morir liés et joieus,

Car cele mors est douce et savereuse
Dont on conquiert le resne presieus,
Ne ja de mort n'en i morra uns sels,
Ains naistront tot en vie glorieuse;
Et saiciés bien, ki ne fust amereus,
Mout fust la voie et boine et deliteuse.

VI.

Dieus! tant avons esté preus par huiseuse,
Or i parra ki a certes iert preus;
S'irons vengier la honte dolereuse
Dont chascuns doit estre iriés et honteus;
Car a no tans est perdus li sains lieux
Ou Dieus soffri por nos mort angoisseuse.
S'or i laissons nos anemis morteus,
A tos jors mais iert no vie honteuse.

- letto 771 volte

Credits | Contatti | © Sapienza Università di Roma - Piazzale Aldo Moro 5, 00185 Roma T (+39) 06 49911
CF 80209930587 PI 02133771002

Source URL: <https://letteraturaeuropea.let.uniroma1.it/?q=laboratorio/wallensk%C3%B6ld>